

明

會

要

明會要卷十一

永新龍文彬纂

禮六 吉禮

祀先代帝王

洪武三年五月遣使訪歷代帝王陵寢命各行省具圖以進凡七十有九禮官考其功德昭著者凡三十有六遣祕書監丞陶誼等往修祀禮親製祝文遣之禮志

四年遣使祭歷代帝王陵寢始罷天下府州縣祀三皇王
通禮部定議合祀帝王三十五 在河南者十陳祀伏羲
高宗孟
周世宗考津祀漢光武洛陽祀漢明帝章帝鄭祀

宋太祖太宗真宗仁宗 在山西者一榮

祀商

在山東者二

東平祀唐堯

在北平者三

內黃祀
商中宗

滑祀顓
顼高辛禹宋

在陝西者十五

中部祀虞舜

在浙江者二

祀夏禹

漢文帝興平祀漢武帝長安祀漢宣帝三原祀唐

在湖廣者二

遠祀黃帝咸陽祀周文王武王

在山西者十五

成王康王漢高帝景帝咸寧

漢武帝長安祀漢宣帝三原祀唐

在正殿五室中一室三皇東一室五帝西一室夏禹商湯周

立廟每歲春秋致祭遂建歷代帝王廟於欽天山之陽爲

六年議定三皇五帝三王及漢唐宋創業之君俱於京師

通考

唐高祖宋太祖元世祖又增祀隋文帝未幾復罷

王圻
七年令帝王廟塑袞冕坐像惟伏羲神農未有衣裳之制

不必加冕服

鄭曉今言

九年遣官省歷代帝王陵寢禁芻牧置守陵戶

本紀

二十一年令每歲郊祀祔祭歷代帝王於大祀殿仍以歲八月中旬擇日遣官祭於本廟其春祭停之又定每三年遣祭各陵之歲則停廟祭

禮志

是年詔以歷代名臣凡三十七人從祀於東西廡爲壇四以宋趙普負太祖爲不忠不可從祀又祀元臣穆呼哩

舊作

而罷其孫安童

王圻通考

永樂元年八月丁巳遣官祭歷代帝王

大政記

十九年遷都帝王廟遣南京太常寺官行禮

禮志

嘉靖十年二月丁卯親祀歷代帝王於文華殿初洪武定制每歲郊祀以歷代帝王祔祭於大祀殿上更定郊制罷之令建歷代帝王廟於都城西歲以春秋致祭至是廟尙未成權於文華殿行之十一年廟成名曰景德崇聖之殿八月壬辰親祭嗣後歲遣大臣一員行禮四員分獻凡子午卯酉祭於陵寢之歲則停秋祭

二十四年罷元世祖陵廟之祀及從祀穆呼哩等復遷唐太宗與宋太祖同室凡十五帝從祀名臣三十二人已上通典

三皇

洪武元年三月用太牢祀三皇二年命以句芒祝融風后

力牧配四年帝以天下郡邑通祀三皇爲瀆禮臣議唐元宗嘗立三皇五帝廟於京師至元成宗時乃立三皇廟於府州縣春秋通祀而以醫藥主之甚非禮也帝曰三皇繼天立極開萬世教化之原汨於醫師可乎命天下郡縣毋得褻祀禮志

嘉靖十五年建聖濟殿於文華殿後以祀先醫會典

二十一年建景惠殿於太醫院北中奉三皇及四配而附歷代醫師於兩廡凡二十八人歲仲春秋上甲日禮部堂上官行禮太醫院堂上官二員分獻用少牢復建聖濟殿於內祀先醫遣太醫院正官行禮通典

隆慶四年禮部侍郎王希烈議三皇既祀於帝王廟請罷太醫院廟祭專遣太醫院官祭先醫不允

春明夢錄

聖師

明初宋濂建議伏羲爲道統之師神農黃帝堯舜禹湯文武以次而列臯陶稷契夷益伊尹傅說箕子太公周公皆天子公卿之師宜秩祀天子之學時不能行至嘉靖九年始祀先聖先師於文華殿東室舊有釋像命撤去奉皇師伏羲神農黃帝帝師堯舜王師禹湯文王武王九聖南向左先聖周公右先師孔子東西向每春秋開講前一日行釋奠禮十六年移祀於永明殿後行禮如初其後常遣官

代祭隆慶初仍於文華殿東室行禮

王圻
通考

先師孔子

洪武元年二月丁未以太牢祀孔子於國學仍遣使曲阜致祭

本紀

二年詔孔廟春秋釋奠止行於曲阜天下不必通祀刑部尚書錢唐上疏言孔子垂教萬世天下共尊其道故天下得通祀孔子侍郎程徐亦以爲言不聽久之乃用其言唐錢傳定制每歲仲春秋上丁皇帝降香遣官祀於國學以丞相初獻翰林學士亞獻國子祭酒終獻禮志

四年命禮官儒臣釐正祀典國子司業宋濂上孔子廟堂

議曰世之言禮者皆取法孔子不以古禮祀孔子是褻禮也古者先師位皆東向漢章帝幸魯祀孔子帝西向再拜唐開元禮先聖東向先師南向三獻官西向猶古意也今襲開元二十七年之制遷神南向失神道尙右之義矣古者木主棲神天子諸侯廟皆有主大夫東帛士結茅爲載無像設之事開元禮設先聖神座於堂上兩楹間今因開元八年之制搏土而肖像焉失神而明之之義矣禮記凡始立學者必釋奠於先聖先師所謂先師者若漢禮有高堂生樂有制氏詩有毛公書有伏生之類古之學者非其師弗學非其學不祭學校旣廢天下莫知所師孔子集羣

聖之大成顏曾思孟實傳其道尊之以爲先聖先師而通祀於天下固宜若七十二子止於國學祀之庶弗悖禮意開元禮國學祀先聖孔子以顏子等七十二賢配諸州惟祀顏子今以苟况之言性惡揚雄之事王莽王弼之宗老莊賈逵之忽細行杜預之建短喪馬融之黨權勢亦廁其中吾不知其何說也古者子雖齊聖不先父食故禹不先鯀湯不先契文武不先不啻宋祖帝乙鄭祖厲王猶尙祖也今同參伋坐饗堂上而其父列食於兩廡間顛倒彝倫莫此爲甚吾不知其何說也古者士見師以菜爲贊故始入學者釋菜以禮先師其學官時祭皆釋奠今專用春秋

非矣釋奠有樂釋菜無樂是二釋之重輕以樂之有無也
今襲用魏晉律所制大成樂乃先儒所謂亂世之音可乎
哉古者釋奠釋菜其儀注雖不可攷然開元禮彷彿儀禮
饋食之節三獻皆有飲福及尸酢主賓之儀今憚其煩惟
初獻行之可乎哉他如廟制之非宜冕服之無章器用雜
乎流俗升降昧乎左右此類甚多不可枚舉同時翰林院
待制王禕亦著孔廟從祀議謂苟况之言性惡揚雄之事
新莽何休注公羊而黜周王魯王弼注易而專尚清虛如
此之等猶在祀列何以在漢獨遺董仲舒在唐獨遺孔穎
達至如宋之范仲淹歐陽修真德秀魏了翁元之吳澄凡

此七人並宜從祀用以蒐累代之曠典昭萬世之公議又謂顏曾思父子配位倒置不免春秋逆祀之譏亟宜釐正其語多與濂合厥後上置國子監先聖改用木主卒從濂議時東閣大學士吳沈嘗著辨言孔子封王爲非禮後布政使夏寅祭酒邱濬皆沿其說及嘉靖改稱先師實自沈發之云

春明夢餘錄

六年八月丁丑遣御史大夫兼領國子監事陳甯釋奠於先師丞相胡惟庸參政馮冕等不陪祀而受胙上以爲非禮命各停俸一月甯不舉奏亦停俸半月自是不預祭者不頒胙著爲令

胡惟庸傳

七年仲春上丁日食改用仲丁

會典

十五年大學落成帝親詣釋奠詔禮官劉仲質等曰孔子道冠百王功參天地今天下郡縣並建廟學而報祀之典止行京師未徧宇宙豈非闕典乃詔仲質等與儒臣共定釋奠儀頒之天下令每歲春秋以上丁日通祀文廟大訓記十七年敕每月朔望祭酒以下行釋菜禮郡縣長以下詣

學行香

禮志

二十六年正月頒大成樂器於天下府學令州縣學如式

製造

會典

二十八年三月壬申以行人司副楊砥言罷漢楊雄從祀

益以董仲舒

紀事本末禮志同會典系之二十九年

三十年十月乙未重建國子監先師廟成

紀本初上以國學

孔子廟隘命工部改作其制皆上所規畫大成殿門各六

楹櫺星門三楹東西廡七十六楹神廚庫皆八楹宰牲所六

楹

永樂初建廟於大學之東

已上禮志

十五年九月丁卯脩曲阜孔子廟成上親製文勒石

十九年北京國子監既定其南監春祭命祭酒行禮

已上通典

宣德三年命禮部考正從祀先賢名位頒示天下

禮志

正統二年以宋儒胡安國蔡沈真德秀從祀

本紀

三年三月禁天下祀孔子於釋老宮孔顏孟三氏教授裴侃言闢里家廟宜正父子以敘彝倫顏子曾子子思子也配享殿廷無繇子晳伯魚父也從祀廊廡非唯名分不正抑恐神不自安况叔梁紇元已追封啟聖王創殿於大成殿西而顏孟父俱封公乞追封子晳伯魚公爵偕顏孟父俱配啟聖王殿帝命禮部行之仍議加伯魚子晳封號禮志系之正統八年會典吾學編王圻通考皆同本紀系此止行之家廟未及國學及府州縣也

八年四月以元儒吳澄從祀禮志系之正統八年會典吾學編王圻通考皆同本紀系初蓋沿大政記之謫

成化十二年祭酒周洪謨言先聖像用冕旒十二而舞佾

豆籩數不稱請備天子制古者鳴球琴瑟爲堂上之樂笙
鏞柷敔爲堂下之樂而干羽則舞於兩階今舞羽居上樂
器居下非制當改尙書鄒幹駁止之洪謨再疏爭帝竟俞

其議

洪謨傳

十三年閏二月丁丑釋奠初用八佾籩豆各十二

春明餘錄夢

宏治八年七月丁亥封宋儒楊時將樂伯從祀孔子廟廷

本紀

九年二月增文廟佾舞七十二人如天子之制

十二年六月甲辰曲阜先師廟災敕有司重建十七年廟

成遣大學士李東陽祭告

正德十六年詔有司改建孔氏家廟之在衢州者官給錢董其役令博士孔承義奉祀

已上
閩
里志

嘉靖九年十一月癸巳大學士張璁請更正孔廟祀典命禮臣會諸臣議改題孔子神位至聖先師去王號及大成文宣之稱改大成殿爲先師廟大成門爲廟門其四配稱復聖顏子宗聖曾子述聖子思子亞聖孟子十哲以下凡及門弟子皆稱先賢某子左邱明以下皆稱先儒某子不復稱公侯伯遵太祖首定南京國子監規制製木爲神主其塑像卽令屏撤春秋祭祀遵國初舊制十籩十豆天下各學八籩八豆樂舞止六佾凡學別立一廟祀叔梁紇題

啟聖公孔氏神位以顏無繇曾點孔鯉孟孫氏配俱稱先
賢某氏程珦朱松蔡元定從祀稱先儒某氏從祀諸賢申
黨卽申帳留帳去黨公伯寮秦冉顏何荀況戴聖劉向賈
逵馬融何休王肅王弼杜預吳澄罷祀林放蘧瑗盧植鄭
眾鄭康成服虔范甯祀於其鄉后蒼王通歐陽修胡瑗宜
增入詔悉如議行又以行人薛侃議進陸九淵從祀三編
隆慶五年九月以薛瑄從祀昭代典則

萬曆十二年十二月以陳獻章胡居仁王守仁從祀
四十一年十二月以宋儒羅從彥李侗從祀已上三編

諸神祠

洪武元年命中書省下郡縣訪求應祀神祇名山大川聖帝明王忠臣烈士凡有功於國家及惠愛在民者著於祀典令有司歲時致祭禮志

三年六月定諸神封號凡後世溢美之稱皆與革去天下神祠無功於民不應祀典者有司毋得致祭同上

宏治元年四月給事中張九功請正祀典章下禮部尙書周洪謨等條議以釋迦牟尼文佛上清太上老君不宜修建齋醮遣官祭告古禮幽祭祭星今北極紫微大帝像之爲人稱之爲帝非典風雲雷雨南郊合祀山川壇復隆秋報今徇道家言又有雷聲普化天尊之祀是瀆也歲以正

月十五日爲真君張道陵生辰遣官祭告非制大小青龍
神禱雨無應不足祀梓潼帝君者傳云神姓張名亞子蜀
人仕晉戰沒人爲立廟唐宋屢封至英顯王元加號爲帝
君景泰中因京師舊廟新之歲以二月三日生辰遣祭神
廟食於蜀宜也與文昌六星無涉其祠在天下學校者當
毀永樂中以道士周思得傳王靈官法有驗乃建天將廟
祀靈官謂宋徽宗時有西蜀薩堅授法於林靈素者其師
也因於廟立祖師殿宣德中改大德觀封靈官曰崇恩真
君祖師曰隆恩真君成化初改顯靈宮歲易袍服其費不
貲當革靈濟宮祀金闕上帝玉闕上帝蓋五代時徐溫子

知證知謬也神世系事蹟非甚異其僭號亦當革於是祀典爲之一正時洪謨建議并謂元武七宿不當信道家武當山修鍊之說城隍非人鬼不當有五月十一日誕辰之祭東嶽泰山旣專祭封內且合祭郊壇則朝陽門外東嶽廟之祭實爲煩瀆帝以崇祀旣久不盡從也三編

明北京有真武廟洪恩靈濟宮成化十三年詔建漢壽亭侯廟又鳳陽有顯應廟滁州有豐山廟柏子潭廟徐州靈源宏濟廟河平神廟平陽平水祠汾水靈澤廟沁州南山廟焦龍神廟龍泉神廟兗州青山廟安平鎮顯惠等廟嚴州烏龍廟宜春仰山廟常德陽山廟沅山顯應廟長沙洞

庭廟馬湖顯應廟福州靈濟宮廣州天妃廟南海真武廟瓊州靈山廟電白靈湫廟誠敬夫人祠皆終明之世有司歲時致祭不絕通典

五祀

泰厲附

洪武二年八月禮部尙書崔亮請依周官門戶中霤竈井五祀歲終臘享通祀於廟門外通典歲暮享太廟時五祀並列廟西廡下東向太常寺官行禮王圻通考

八年七月禮部奏五祀之禮孟春祀司戶孟夏祀司竈季夏祀中霤孟秋祀司門孟冬祀司井四孟月之祭則於有事太廟之日制可昭代典則

永樂間改定四孟祭戶寵門非於四立日中雷於季夏土
王後戊日皆遣內臣祭歲暮太常卿合祀於太廟丹墀西
東向通典

洪武三年定制京都祭太厲設壇元武湖中歲以清明及
十月朔日遣官致祭王國祭國屬府州祭郡屬縣祭邑厲
皆設壇城北一年二祭如京師里社則祭鄉厲禮志

泰厲國厲郡邑厲一年二祭春以清明日冬以十月朔日
鄉厲一年三祭春以清明日秋以七月十五日冬以十月

三日明集

通典注明祭五祀而不及行厲其京都有泰厲之祭更

有郡邑厲鄉厲卽倣祭法泰厲國厲族厲而變通之亦合於五祀者也

明會要卷十一

明會要卷十二

永新龍文彬纂

禮七

嘉禮

朝儀

吳元年十二月癸丑李善長帥百官奉表勸進甲子進登

極儀

洪武元年正月乙亥上祀南郊服袞冕登壇禮成羣臣奉
上卽皇帝位舞蹈呼萬歲者三具鹵簿導從詣太廟上追
尊四世冊寶告祀社稷還御奉天殿善長帥百官上賀表

已上大政記

九月定正旦朝賀儀與登極略相仿其後屢詔更定立爲

中制禮

三年七月定朔望升殿百官朝參禮

大政記

六年九月禮部奏定百官常朝班次及奏事等禮儀帝謂中書省臣曰朝廷之禮所以辨上下正名分百官有列班序有倫非惟尊體統抑亦四方瞻仰所在也今文武百官朝參奏事有未嫻禮儀者是禮法不嚴於殿陛何以訓天下自今凡新任官及諸武臣於禮儀有不嫓習者令侍儀司官日於午門外演習之且命御史二人監視有不如儀者糾舉之百官入朝失儀者亦糾舉如律大訓又令朝班

每日都察院輪委御史二員侍班糾察失儀

會典

十一年詔朝參文武官給領牙牌懸帶出入無牌者依律

論罪

會典

十三年九月乙巳天壽節始受羣臣朝賀後以爲常

本紀初

上卽位中書省請於聖壽節帥百官行慶賀禮上不許至是李善長等以天下太平上春秋高請以聖節日受賀許之其在外諸司五品以上自明年始俱聽表賀

王圻通考

十七年罷朔望起居禮

禮志

二十年九月乙未天壽聖節受朝賀宴羣臣於奉天殿皇

太子宴國戚及東宮官於文華殿

王圻通考

二十二年令凡遇大朝賀除已習儀及具服官員許入班其餘便服人員止於午門外行禮執事官於華蓋殿行禮披甲帶刀侍衛之人免拜五府六部等官於殿內侍立今皆入班奏事止於華蓋殿同上

二十六年六月壬寅重定朝賀傳制等儀

大政記

三十年令通政司許早晚朝奏事及有軍情重事不時入奏其各衙門事務止於早朝大班內奏啟不許朝退又將瑣碎事務於右順門題奏會典

惠帝初卽位視朝晏御史尹昌隆疏諫曰高皇帝雞鳴而起昧爽而朝未日出而臨百官故能庶績咸熙天下乂安

陛下嗣守大業宜追繩祖武兢兢業業憂勤萬幾今乃卽
於晏安日上數刻猶未臨朝羣臣宿衛疲於伺候曠職廢
業上下懈弛播之天下傳之萬世非社稷福也帝曰昌隆

言切直禮部其宣示天下使知朕過

昌隆傳

建文元年正月癸酉朔上受朝不舉樂

二年正月丙寅朔詔天下來朝官勿賀

三年正月辛酉朔以凝命神寶成告郊廟始御奉天殿受
朝賀

永樂元年正月己卯朔上御奉天殿受朝賀宴文武羣臣
及屬國使

已上紀

四年正月丙辰初御午朝帝諭六部及近侍曰早朝四方奏事多君臣之間不得盡所言午後事簡卿等有所欲言可從容陳論毋以將晡朕倦於聽納朕有所欲言者亦欲及此時與卿等商榷也

大訓記

七年諭行在禮部曰北京冬氣嚴凝羣臣早朝奏事久立不堪今後朝見畢於右順門內便殿奏事

王折通考

十一年正月辛酉朔日有食之先是鴻臚寺奏元旦賀儀帝召禮部問曰旦日當食百官朝賀可乎尙書呂震請朝賀如常侍郎儀智持不可上問楊士奇對曰日食天變之大者前代元旦日食多不受賀宋仁宗時元旦日食富弼

請罷宴撤樂呂夷簡不從弼曰萬一契丹行之爲中國羞
後有自契丹回者言是日罷宴仁宗深悔今免賀誠當上
從之詔曰朕乖治理上累三光眾陽之宗薄食元旦羣臣
尙勉輔朕消弭災變朝賀宴會其悉罷免三編

十九年三月己酉萬壽節以三殿災止賀

本紀

二十一年令聖節正旦冬至俱赴朝天宮習儀凡正旦節
自十二月二十八日起至正月二十日止百官俱吉服通
政司不奏事冬至聖節前三日後三日俱吉服通政司亦
不奏事王沂通考

洪熙元年正月壬申朔御奉天門受朝不舉樂本紀

宣德十年正月英宗卽位始罷午朝

同上

景泰元年正月朔罷朝賀以上皇在衛喇特也

十一月辛亥禮部尙書胡濶請令百官賀上皇生日不許
十二月濶又請明年正旦百官朝上皇於延安門亦不許
二年八月復午朝自永樂初舉午朝後漸罷不行給事中
葉盛疏請復之帝卽報可已上三編

成化四年十月吏部尙書李秉等及九卿各衙門俱午朝
失期不及入侍聯名上奏待罪詔爾等常以勤政爲言及
朕視午朝卻又怠慢旣引咎姑宥之王圻通考

十三年令朝覲外官及舉監人等不許擅戴暖耳入朝

同上

八月戊戌早朝東班官若聞有甲兵聲者因辟易不成列
衛士爭露刃以備不虞久之始定

昭代典則

宏治元年三月吏部侍郎楊守陳請遵祖制日再御朝略言早朝但如舊儀午朝則御文華門大臣臺諫更番侍直事已具疏者用揭帖舉崖略口奏陛下詳問而裁決之在外文武官來覲俾條列地方事面陳大要付諸司評議其陞辭赴任者隨所職任而戒諭之有大政則御文華殿使大臣各盡其謀勿相推避不當則許言官駁正其他具疏進者召閣臣議可否以行

楊守陳傳

四年八月復午朝

王圻通考

帝自八年後視朝漸晏十年二月徐溥等上疏略言舊制內殿日再進奏事重者不時上聞又常面召儒臣咨訪政事今奏事日止一次朝參之外不得一望天顏章奏批答不時斷決或稽留數月或竟不施行事多壅滯有妨政體

徐溥傳

十三年六月戊子御史劾西甯侯宋愷等文武官五百有六人朝參不至有詔宥之仍奪一月俸實錄

正德十一年十一月壬辰六科都給事中葉相等言邇來月不數朝朝或入晏今冬至元旦令節在邇天下諸司官朝覲及宗藩四夷皆入賀朝廷舉動四方儀法不可不慎

伏望夙興視朝以示法天下十三道御史屠喬等亦言近日免朝日多視朝日少諸司百辟惟知有左順門之趨候而已伏望罷順門之傳旨復奏事之舊規皆不報通紀

十五年帝至南京詔百官戎服朝明年正旦尙書喬宇不可率諸臣朝服賀喬字傳

嘉靖元年王鏊奏國朝聖節正旦冬至大朝會則奉天殿卽古之正朝也常朝則奉天門卽古之外朝也而內朝獨缺非缺也華蓋武英等殿卽內朝之遺制洪武中如宋濂劉基永樂以來如楊士奇楊榮蹇義夏原吉等常奏對便殿今內朝罕復臨御常朝之後人臣無得進見三殿高闕

上下之情壅而不通伏乞陛下於常朝外御文華武英倣
古內朝之意大臣三日或五日一次起居侍從各一員上
殿輪對諸司有事咨決上與大臣面議如此人人得以自
盡陛下雖身居九重而天下之事燦然畢陳於前矣疏入

報聞春明夢餘錄

二年八月丁未萬壽節從吉受朝以孝惠制未終免宣表
雞唱山呼大政記

三年二月昭聖皇太后壽旦詔免諸命婦朝賀脩撰舒芬
言前者興國太后令旦命婦朝賀如儀今遇皇太后壽節
忽行傳免恐失輕重之宜乞收成命以彰聖孝帝怒奪俸

三月

舒芬傳

御史朱淵言皇太后親挈神器以授陛下母子

至情天日昭鑒若傳免朝賀何以慰親心而隆孝治御史

馬明衡言暫免朝賀在恆時猶可在議禮紛爭之時則斷

不可帝怒並下詔獄

朱淵傳

七年令凡正旦冬至聖節百官俱於先期之三日及二日
習儀正旦冬至於朝天宮聖節於靈濟宮

會典

舊制冬至日卽行賀禮嘉靖九年分祀二郊以冬至大報
是日行慶成禮次日行冬至朝賀禮畢舉慶成宴再定次
日帝詣內殿行節祭禮又詣母后前行賀禮畢始御奉天

殿受賀

禮志

十八年十二月以大行皇太后之喪罷明年元旦朝賀時
禮部請以本月三十日已當二十七日除服之期仍復疏
專請是日御殿受朝奉旨詰責然猶素服御殿百官行八
拜禮鳴鐘鼓鞭奏堂下樂上以服除令如議行皆嚴嵩等
所請也

實錄

隆慶元年正月癸亥有詔免朝越三日復傳免給事中魏
時亮以新政不宜遽忘上疏切諫

魏時亮傳

常朝舊制每日御門決事萬曆初以方在諒闇聖齡沖幼
閣臣議酌三六九日視朝及二年五月禮部請復舊制閣
中擬二票上請仍定三六九日遂沿爲例

春明夢餘錄

萬曆三年大學士張居正奏請常朝御皇極門每日輪該記注起居並史官共四員列於東班給事中之上午朝御會極門列於御座西稍南專記言動詔依擬行通典

七年諭衍聖公以萬壽入賀朝廷待以賓禮不在文武職官之列不必朝參同上

十七年正月己酉朔日有食之免元旦朝賀自是每元旦皆不視朝矣三編

諸王來朝

明倣古封建親王之藩不常入朝朝則賜賚甚厚禮志洪武二十一年九月丙戌秦晉燕周楚齊湘魯潭九王來

朝本紀

二十四年十一月庚戌晉王柵來朝初柵在國驕縱多不法上欲罪之至是隨太子來朝上怒稍解仍勅歸藩晉王傳

二十五年春正月戊子周王櫟來朝壬寅晉王柵燕王棣楚王楨湘王柏來朝

二十六年二月乙酉蜀王椿來朝四月戊子周王櫟來朝八月癸未秦晉燕周齊五王來朝九月癸丑代肅遼慶甯五王來朝已上

是年定諸王大朝行八拜禮常朝一拜凡伯叔兄見天子在朝行君臣禮便殿行家人禮天子伯叔五十不朝兄弟

叔姪六十不朝俱令世子代之

通典

永樂二年九月丙午周王櫛來朝獻駒虞百官請賀不許

本紀

四年三月齊王榑來朝廷臣劾其罪榑厲聲曰奸臣喋喋
又欲效建文時耶會盡斬此輩帝聞之不憚留之京師削
官屬護衛

齊王傳

正統八年二月戊戌淮王瞻燠來朝丙午荆王瞻爗來朝

本紀

天順元年四月襄王瞻墡來朝賜宴便殿特命百官朝王
於館尋請還帝親送至午門外握手泣別諸王自谷府變

後來朝久不許至是乃特行之四年復入朝六年又召以老辭歲時存問禮遇爲諸藩所未有

三編

六年六月戊辰淮王祁銓來朝

本紀

宏治八年太皇太后召崇王見澤來朝禮部尙書倪岳言數年來三王之國道路供億民力殫竭今召王復來往返勞費兼水溢旱蝗舟車所經恐有他虞親王入朝雖有故事自宣德來已鮮舉行英宗復辟襄王奉詔來朝雖篤敦敘之恩實塞疑謗之隙非故事也大學士徐溥亦以爲言

帝爲請乃已

崇王傳

諸司朝覲

明制天下官三年一入朝自十二月十六日始鴻臚寺以

次引見禮志

洪武元年正月天下來朝官陞辭上戒諭之遂爲令

大政記

六年正月覲天下府州縣官

三編

十一年正月徵天下布政使及知府來朝

本紀

十六年十一月定諸司來朝及差回者先朝見後詣所司
否者以違制論

大政記

十八年正月癸酉天下布按二司及府州縣來朝者凡四
千一百餘人五月戊申諭吏部曰外官一歲一朝未免曠
官滋費自今定爲三年一朝著爲令

昭代典則

永樂十年正月己丑命入覲官千五百餘人各陳民瘼不言者罪之言有不當勿問

本紀

天順三年十二月令凡方面官入朝遞降京官一等序立

大政記

萬曆二年正月召見朝覲廉能官於皇極門面加獎勵賜

銀幣酒饌

三編

朝賀中宮

洪武元年九月定皇妃以下正旦冬至朝賀儀

二年正月皇后受命婦朝於坤甯宮賜宴

已上大政記

二十六年重定中宮朝賀儀

禮志

永樂元年正月己卯朔命婦朝坤甯宮二月丙辰千秋節

命婦入朝

大政記

二年九月徐皇后一日問陛下誰與圖治者帝曰六卿理政務翰林職論思后因請悉召見其命婦賜冠服鈔幣諭之曰婦之事夫奚止饋食衣服而已必有助焉朋友之言有從有違夫婦之言婉順易入吾旦夕侍上惟以生民爲念汝曹勉之

傳后妃

三年四月定命婦朝賀止三品以上餘悉免之

大政記

嘉靖十三年正月壬子立方氏爲后越三日頒詔天下明日受命婦朝賀

上同

崇禎五年三月二十八日皇后千秋命婦例當朝賀久不行上請允之甲戌三月命婦再朝是日皇后母嘉定伯夫人亦入班朝賀畢卽召入殿皇后欲設座拜之辭不許春明

錄
夢餘

朝賀東宮

洪武元年上以東宮師傅皆勳舊大臣當待以殊禮命禮官定三師朝賀東宮儀議曰唐制羣臣朝賀東宮行四拜禮皇太子答後二拜三公朝賀前後俱答拜今擬凡大朝賀設皇太子座於大本堂設答拜褥位於堂中設三師賓客諭德拜位於前仿唐制行四拜禮皇太子答後二拜從

之通典

十四年給事中鄭相奏舊制百官見東宮皆稱名惟宮臣稱臣下廷臣議編脩吳沈等曰東宮國之大本所以繼聖統承天位也臣子尊敬之禮不宜有二請凡啟事皇太子者皆稱臣如故從之

吳沈傳

二十九年重定諸王見東宮儀朝見後於內殿行家人禮以諸王皆尊屬也

本紀

宣德九年三月戊寅文武羣臣朝皇太子於文華殿

大政記

成化十四年三月甲子朔皇太子冠禮部請每月朔望文武百官奉天殿朝參後皆赴文華殿謁太子制曰可

憲皇帝錄

隆慶五年正月大學士李春芳言先朝故事東宮未出閣時閣臣以朔望次日行謁見禮卽今春和乞舉行如例上許之二月甲午廷臣及朝覲官謁皇太子於文華左門折

考通

朝賀班序

洪武三年正月癸巳命宰臣定百官入侍班序

昭代
典則

定文

武官五品以下並列班於丹陛左右不得上殿

大政記

三月禮部奏案宋制駙馬班次出入皆依官品今駙馬旣授官職當依百官由西門出入其班次品級當在百官之上如一品在一品之上二品在二品之上從之錄

實錄

十六年禮部尙書任昂請更定朝參次序

任昂傳

二十年十月丁卯禮部尙書李原名考正禮儀重定朝參及筵宴儀朝班序立公侯居文武班首次駙馬次伯自一品以下各以序文東武西風憲糾儀官居下北面紀事官居文武第一班之後稍近上以便觀聽不得攬越如奏事須從班末至御前跪奏不得班內橫過實錄

二十四年定侍班官員凡文武官員除分詣文華殿啟事外如遇陞殿各用履輶照依品級侍班有違越失儀者從監察御史儀禮司糾劾又令禮部置百官朝班序牌大書品級列丹墀左右木柵上文武百官照品序立朝參之時

將軍先入近侍次之公侯駙馬伯又次之五府六部又次之應天府及在京雜職官員又次之

會典

永樂初令內閣官侍朝立金臺東錦衣衛在西後移御道

東西對立

禮志

仁宗卽位戶部尙書夏原吉加太子少傅呂震以太子少師班原吉上帝命鴻臚引震列其下進少保

夏原吉傳

景泰初定午朝儀內閣五府六部奏事官六科侍班官按西序立侍班御史二序班二將軍四按南北立鳴贊一按東西向立錦衣衛鴻臚寺東向立管將軍官侍衛官立

於將軍西

禮志

三年令師保兼官品同者立班以衙門爲次

會典

成化十四年令進士照辦事衙門次第立於見任官後

同上

宏治元年三月禮部進午朝儀注

實錄

二年六月戊子朔主事林沂奏欲按品秩列坐御史上爲御史劾之曰朝廷設官分職有拘品秩者有不拘品秩者故慶成宴科道坐郎中之上翰林坐科道之前若概以品秩則諸學士當列於少卿之下京縣知縣兵馬司當列於御史給事中之上矣上以沂故違成憲黜之

春明夢餘錄

嘉靖七年帝方視朝見張璁桂萼班兵部尙書李承勛下意嫌之乃手敕加璁萼俱太子太保

張璁傳

舊制右班武臣以都督爲先自嘉靖以來錦衣權重又陸炳朱永皆三公重銜官在都督之上故列於首萬曆戊寅朱已沒掌錦衣者俱都指揮等官相沿舊規仍立前列其後遂有爭議部中不能持可否乃令錦衣仍前立行稍下都督立其後稍上非正禮也

春明夢餘錄

隆慶元年都給事中辛自修等以朝儀久曠班行不肅請令禮官考議成式禮部禮科會議國初定制百官以品序立其後更定又有不拘於品者如內閣錦衣衛升立寶位之東西翰林學士列於僉都御史之上其他翰林官不論品級序於京堂之內科道官自爲一等列於部屬之先及

鴻臚寺尙寶司列於西階三科六道與東班對侍雖若次序參錯然或以顧問糾察或以奉事承旨莫不有因難以輕改今後常朝悉如此例其餘官員仍依品級崇卑衙門次序爲例如有紊越聽糾儀官糾奏從之通典

萬曆四年題准五府都督官常朝班次不當入侯伯班仍照殿班立於錦衣官之後稍上俟錦衣衛堂上官詣金臺邊北司官於臺下各侍立仍與南北無執事官同班而序於其上同上

十一年令於金水橋邊增設序班三員北向站立俟東西兩班站定各於班末熟視有回顧耳語咳嗽吐唾者卽時

糾舉同上

免朝參

吳元年以朱升爲侍講學士升年老特免朝謁

本傳

洪武三年以危素爲宏文館學士賜小車免朝謁

本傳

十五年六月令國學官年老者遇暑月及雨雪免朝參

成祖初令功臣年老者免朝參

已上大政記

永樂十七年工部尙書宋禮自蜀召還以老疾免朝參

本傳

宣德時刑部尙書金純有疾上命醫視療稍間免朝參

本傳

正統十四年十一月令京營官直操日免朝參

大政記

景泰時尙書王直年益高帝優禮之免其常朝

成化五年彭時得疾在告踰三月帝趣赴閣辦事免朝參
宏治初王恕連章求去帝輒慰留且以其老特免午朝遇
大風雨雪早朝亦免

六年邱濬以目疾免朝參

十年徐溥引年求退不許詔風雨寒暑免早朝

已上各見本傳

嘉靖二年六月吏部尙書喬宇在告免朝參專理部務

大政記

五年楊一清復相世宗以一清老臣特免常朝日講侍班
朔望朝參

本傳

七年大學士謝遷力求去帝不許待之愈厚以天寒免朝

參本傳

輟朝

凡聞皇妃喪輟朝三日發引下葬各免朝一日親王喪輟朝二日公主喪及下葬各輟朝一日郡王及文武大臣喪年終類輟朝一日先期禮部具奏出告示於長安左右門至日早朝不鳴鐘鼓不鳴鞭不設儀仗文武百官各服淺淡服黑角帶於奉天門朝參會典

洪武十七年徐達卒帝爲輟朝臨喪

本傳

大政記

二十三年三月定公侯卒葬輟朝禮

大政記

二十四年懿文太子薨禮官議期喪請以日易月及當除

服帝不忍禮官請之始釋服視朝

興宗傳

二十八年秦王棟薨禮部尙書任亨奏言考宋制宜輶朝五日今遇時享請暫輶一日

禮志

宣德五年二月定忌辰輶朝之例

昭代典則

正統八年五月戊寅雷震奉天殿鳴吻上輶朝祭告

大政記

成化八年忻王見治薨發引日帝不視朝及葬輶朝一日

禮志

十一年三月定侯伯襲爵未久而卒者止與祭不輶朝

大政

記

嘉靖二十八年莊敬太子薨輶朝十日

禮志

卷之三
宴禮

明制有大宴中宴常宴小宴

禮志

凡大祀天地次日慶成及正旦冬至聖節大宴立春元宵四月八日端午重陽臘八日永樂間俱於奉天門賜百官宴用樂其後皆宴於午門外不用樂

會典

洪武元年正月丁丑大宴羣臣於奉天殿三品以上升殿餘列丹墀

大政記

三年十一月丙申大封功臣戊戌大宴

明紀

十五年正月辛巳宴羣臣於謹身殿始用九奏樂

本紀

二十六年重定大宴禮陳於奉天殿

禮志

凡賜宴文臣四品以上及諸學士武臣都督以上皆宴殿上經筵官及翰林講讀尚寶司卿六科都給事中暨文臣五品堂上官武臣都指揮以上官宴中左中右門翰林院中書舍人左右春坊御史欽天監太醫院鴻臚寺官及五品以上官宴於丹墀

春明夢餘錄

成祖初以冊立中宮宴文武羣臣四品以上於奉天殿五品以下於丹墀命婦宴於坤甯宮

明政統宗

永樂元年四月癸亥萬壽節宴百官詔豫定班次命駙馬儀賓及隨侍各王來朝官宴於三公府四品以上文武官諸學士侍宴奉天殿在京各衙門堂上六品以上官近侍

官脩史官宴於中左門外進表官四夷朝貢宴於中右門
餘文武宴於丹墀內實錄

八年七月上至北京大宴羣臣於奉天殿未預宴者各賜
之鈔明政統宗

十九年正月甲子朔以北京郊社宗廟及宮殿成大宴禮志
二十年九月辛未諭從征功勞將士分四等賜宴楊榮金
幼孜皆列前席受上賞楊榮傳

二十二年五月丁酉宴從征文武大臣於應昌命中官歌
太祖御製詞五章曰此先帝所以垂戒後嗣也雖在軍旅
不敢忘已亥次歲遼州復宴羣臣自製詞五章命中官歌

之紀

本

文皇友愛諸弟每來朝賜宴於華蓋殿世子郡王則皇太子宴於文華殿獨宴尙師哈立麻亦華蓋殿蓋以親王例待之也

春明夢餘錄

永樂間尙書滿九載如趙羣夏原吉蹇義方賓副都御史李慶賜宴華蓋武英等殿後內閣一品九載亦如之

同上

凡百官於奉天華蓋謹身武英等殿侍宴奏對皆穿禮鞋上殿違者罪之

王圻通考

宣德三年三月宴大臣於西苑

三編

賜宴之日其官卑祿薄者免宴賜以鈔謂之節錢

春明夢餘錄

八年正月宴卓異官何文淵等七人於闕廷記

大政記

洪武初賜諸進士宴於中書省宣德五年賜宴於中軍都督府八年賜宴於禮部遂著爲令

選舉志

皇太后聖誕正統四年賜宴午門東宮千秋節永樂間賜府部堂上春坊科道近侍錦衣衛及天下進箋官宴於文華殿宣德以後俱宴午門外

禮志

正統六年九月三殿成十一月甲午朔上御奉天殿賜文武落成宴

編三

十年正月宴天下來朝賢能官於禮部

通紀

天順二年十一月罷冬至宴上謂李賢曰節固當宴但殺

牲畜太多尙有正旦慶成一歲四宴朕欲減之由是每歲二宴至正旦亦或不宴唯慶成一宴歲以爲常

憲章錄

嘉靖二年十二月帝以災異頻仍欲罷明年郊祀慶成宴裴紹宗言祭祀之禮莫大於郊丘君臣之情必通於宴享往以國戚廢大禮今且從吉宜卽舉行豈可以災傷復免脩撰唐皋亦以爲言從之

明紀

三年正月庚辰免上元節宴

實錄

六年正月太祀先期禮官以宴請帝曰郊祀慶成次日設宴乃祖宗朝故典蓋以上帝監歆君臣歡會其禮誠不可廢也今四方災異非常方欲上下同加脩省恐多費勞民

可暫免一年以見朕奉天恤民之意惟四夷使臣賜宴如故通典

武定侯郭勛以會武宴列尙書下疏爭之兵部尙書李鍼言中府官之有會武宴猶禮部之有恩榮宴也恩榮禮部爲主會武中府爲主故皆列尙書之次宴圖可徵不得引團營故事帝竟從勛言李鍼傳

十年九月乙丑西苑宮殿成帝置宴見兵部尙書王時中工部尙書蔣瑤席在外命移殿內而移皇親於殿右以讓瑤曰親親不如尊賢蔣瑤傳

隆慶元年八月詔翰林官撰中秋宴致語徐階言先帝未

徹几筵不可宴樂帝爲罷宴

徐階傳

萬曆十三年大學士申時行特賜宴禮部九卿三品皆陪列蓋前所未有也

春明夢錄

賜食

洪武中每旦視朝畢上御奉天門或華蓋武英等殿公侯一品官侍坐門內二品至四品及翰林院坐門外五品以下官於丹墀內贊拜叩頭就坐光祿寺進膳各設饌食畢叩頭而退日以爲常二十八年十月以禮臣言罷之昭代典則宣德四年十二月帝以霜寒命光祿寺賜早朝官羊酒謂侍臣曰皇祖考臨朝旦常賜食必謹識無忘

鄧元錫書

明會要卷十二終

明會要卷十三

永新龍文

禮八嘉禮

上尊號徽號

吳元年十二月癸丑相國李善長等奉表勸進帝曰始吾卽王位不得已勉從眾言今卿等復勸卽帝位恐德薄不足以當之羣臣固請上固卻之明日善長等復請曰殿下謙讓之德著於四方感於神明願爲生民計早徇羣臣之請上曰中原未平軍旅未息吾意天下大定然後議此而卿等屢請不已此大事須詳酌禮儀而行

洪武元年正月乙亥昭告上帝皇祇追尊四代祖考妣爲
皇帝皇后奉上玉寶玉冊冊曰祖父有天下傳之子孫子
孫有天下追尊祖考此古今之通義也某遇天下兵起躬
擐甲胄戡定四方以安人民土地日廣皆祖考深仁厚德
所致也諸臣庶推尊爲皇帝先世考妣未致尊崇謹上皇
帝皇后尊號已上大訓記

天子登極奉母后或母妃爲皇太后則上尊號其後或以
慶典推崇皇太后則加二字或四字爲徽號上徽號致詞
而上尊號則止進冊寶會

上皇太后尊號自宣宗登極始

禮志

英宗復辟岷王徽燦請上皇太后尊號禮部以非本朝故事乃止已而尙寶司少卿錢溥謂陳汝言曰復辟之初非奉太后詔誰敢提兵入禁今論功行賞無虛日而母后徽號未加甯非闕典汝言以聞帝大悅及問李賢曰此莫大之孝也遂上尊號曰聖烈慈壽皇太后明代宮闈徽號自此始三編

憲宗卽位議上兩宮徽號中官夏時欲獨尊貴妃爲太后李賢彭時持不可頃之中官傳貴妃旨曰子爲皇帝母爲皇太后豈有無子而稱太后者宣德間有故事彭時曰今日事與宣德異胡后上表讓位故正統初不加尊今名分

固在安得爲比中官曰如是何不草讓表時曰先帝時未嘗行今誰敢草中官復厲聲怵之時拱手面天曰太祖太宗神靈在上誰敢二心錢后無子何所規利而爲之爭不忍默者欲全主上聖德耳若推大孝之心則兩宮並尊爲宜賢亦極言之議遂定將上冊寶彭時曰兩宮同稱則無別錢皇后請加二字以便稱謂從之彭時傳

嘉靖十五年十二月甲寅兩宮皇太后徽號增至八字皇太后張氏加上昭聖恭安康惠慈壽皇太后蔣氏加上章聖慈仁康靜貞壽大政記

神宗卽位上兩宮尊號舊制天子立尊皇后爲皇太后若

有生母稱太后者則加徽號以別之馮保欲媚貴妃因以並尊風張居正下廷臣議尊陳皇后曰仁聖皇太后生母貴妃李氏曰慈聖皇太后始無別矣后妃傳

冊封皇子

洪武三年二月考定諸王冊封禮儀寶制四月辛酉以封建告太廟宴羣臣於奉天殿及文華殿帝諭廷臣曰元失其馭羣雄並起四方鼎沸民遭塗炭朕躬率師旅以靖大難皇天眷佑海宇甯謐然天下之大必樹藩屏上衛國家下安生民今諸子旣長宜各有爵分鎮諸國朕非私其子乃遵古先哲王之制爲久安長治之計羣臣對曰陛下封

建諸王以衛宗社天下萬世之公議帝曰先王封建所以庇民周行之而久遠秦廢之而速亡漢晉以來莫不皆然其間治亂不齊特顧施爲何如耳

乙亥冊封諸皇子爲王詔天下曰朕惟帝王之子居嫡長者必正儲位其諸子當封以王爵分茅胙土以藩屏國家朕今有子十人卽位之初已立長子標爲皇太子諸王之封本待報賞功臣之後然尊卑之分所宜早定乃以四月七日封子機爲秦王樞爲晉王棟爲燕王楠爲吳王楨爲楚王博爲齊王梓爲潭王杞爲趙王檀爲魯王從孫守謙爲靖江王皆授以冊寶置相傳官屬

冊秦王文曰昔君天下者必建屏翰然居位受福國於一方並簡在帝心第二子棟今命爾爲秦王永鎮關中豈易事哉朕起農民與羣雄並驅艱苦百端志在奉天地享神祇張皇師旅伐罪弔民時刻弗怠以成大業今爾有國當恪敬守禮祀其宗社山川謹兵衛恤下民必盡其道體朕訓言尙其慎之諸王文同

冊靖江王文曰朕稽古帝王撫有方夏必茂建親支所以敦族固本其來尙矣朕旣爲天子追念吾兄以爾守謙兄之孫也俾王靖江以鎮廣海之域毋忘訓語益脩厥身尙其慎哉已上大訓記

二十八年八月更定皇太子親王等封爵冊寶之制皇子親王俱授金冊金寶皇太子妃王妃公主授金冊不用寶

記大政

成化末封岐益衛衡雍五王帝親告奉先殿遣使就各王府冊之罷臨軒禮諸王當襲封者俱於歲終遣官冊封嘉靖中改於孟春著爲令

通典

崇禎十四年九月辛卯封皇子慈炯爲王先是上諭禮臣曰朕第三子慈炯年已十齡敬遵祖制宜加王號但旣受冊封必具冕服而會典開載年二十五始行冠禮十齡受封加冠二禮並行可乎於是禮臣歷考典故參稽經傳

以奏乃冊封爲定王仍俟至十二歲始行冠禮

諸王傳

行幸

洪武元年四月甲子車駕發京師幸汴梁五月庚寅至汴

梁辛卯改汴梁曰開封府六月壬寅躬祀開封府諸神仍

遣官祭境內山川

大政記

八月己巳詔以應天爲南京開封爲北京壬午幸北京

本紀

二年九月癸卯詔以臨濠爲中都

大政記

四年二月甲戌幸

中都

本紀

五年定出巡儀注車駕出入有司肅清道路官民不許開門觀望行立所在官員父母合迎駕者於仗外路右叩頭

俯伏候車駕前行方起若遇駐蹕之處合迎駕之人行五

拜禮

王折通考

八年四月辛卯幸中都

本紀

永樂六年八月丙戌詔曰成周營洛肇啟二都有虞勤民尤重巡省朕君臨天下統御之初已升北平爲北京今國家無事省方維時將以明年二月巡幸北京命皇太子監國親王止離王城一程迎候官吏軍民於境內朝見非經過之處毋得出出境凡道途供應皆已節備有司不得有所進獻尋命禮部頒巡狩禮並行直省凡有重事及四夷來朝與進表者俱達行在所小事達京師啟皇太子奏聞賈

是年改定巡狩儀車駕將發奏告天地社稷太廟孝陵祭
大江旗纛等神輶祭於承天門將至北京境上設壇祭北
京山川等神車駕至北京奏告天地祭境內山川

王圻通考

八年七月壬午至北京

十一年二月甲子幸北京

十五年三月壬子北巡

宣德五年九月乙卯巡近郊己未還宮十月丙子巡近郊
至洗馬林遍閱城堡兵備

已上本紀

六年七月帝微行漏下十二刻帝從四騎幸楊士奇宅士
奇倉皇出迎頓首曰陛下奈何以宗廟社稷之身自輕帝

日會卷二十三
三
曰朕思卿一言故來耳越數日帝遣內官問士奇微行有何不可對曰陛下尊居九重幽隱豈能遍治萬一冤夫怨卒窺間竊發誠不可不慮後旬餘獲二盜如士奇言帝曰今而知卿之愛朕也

三編

九年九月上率師巡邊癸未車駕發京師庚子回鑾

王折通考

正統十三年十月幸大興隆寺

三編

天順三年十月己未幸南海子

四年十月戊辰幸南海子

已上本紀

正德九年二月庚子帝始微行

王折通考

十二年七月帝聽江彬言將出關幸宣府巡關御史張欽

上疏諫曰比者人言紛紛謂車駕欲度居庸遠遊邊塞臣
度陛下非慢遊蓋欲親征北寇也不知北寇猖獗但可遣
將徂征豈宜親勞萬乘英宗不聽大臣言六師遠駕遂成
己巳之變夫匹夫猶不自輕奈何以宗廟社稷之身蹈不
測之險况今內無儲貳國家多事甘肅有吐蕃之患江右
有葦賊之擾淮南有漕運之艱巴蜀有採辦之用京畿諸
郡夏麥少收秋潦爲沴而陛下不虞禍變欲縱轡長驅觀
兵絕塞臣竊危之已聞朝廷切諫皆不納復疏言臣愚以
爲乘輿不可出者有三人心搖動供億浩繁一也違涉險
阻二宮懸念二也北寇方張難與之角三也臣職居言路

奉詔巡關分當效死不敢愛死以負陛下疏入不報八月
朔帝微行至昌平傳報出關甚急欽命指揮孫璽閉關納
門鑰藏之分守中官劉嵩欲詣昌平朝謁欽止之曰車駕
將出關是我與君今日生死之會也關不開車駕不得出
違天子命當死關開車駕得出天下事不可知萬一有如
土木我與君亦死甯坐不開關死死且不朽頃之帝召璽
璽曰御史在臣不敢擅離乃更召嵩嵩謂欽曰吾主上家
奴也敢不赴欽因負敕印手劍坐關門下曰敢言開關者
斬夜草疏曰臣聞天子將有親征之事必先期下詔廷臣
集議其行也六軍翼衛百官扈從而後有車馬之音羽旄

之美今寂然一不聞輒云車駕卽日過關此必有假陛下
名出邊句賊者臣請捕其人明正典刑若陛下果欲出關
必兩宮用寶臣乃敢開不然萬死不奉詔奏未達使者復
來欽拔劍叱之曰此詐也使者懼而返爲帝言張御史幾
殺臣帝大怒顧錢甯爲我趣捕殺御史會梁儲蔣冕等追
至沙河請帝歸京師帝徘徊未決而欽疏亦至廷臣又多
諫者帝不得已乃自昌平還意怏怏未已又二十餘日欽
巡白羊口帝微服自德勝門出夜宿羊房民舍遂疾馳出
關數問御史安在欽聞追之已不及欲再疏諫而帝使中
官谷大用守關禁毋得出一人欽感憤西望痛哭於是京

師傳張御史閉關三疏云

張欽傳

十三年正月丙午至自宣府命羣臣具綵帳羊酒郊迎御帳殿受賀辛酉復如宣府

本紀

七月丙午復如宣府工科都給事中石天柱念帝盤遊無度羣臣雖諫帝意不回思所以感動之者乃刺血草疏略曰臣竊自念生臣之身者臣之親也成臣之身者累朝之恩也感成身之恩欲報之於陛下者臣之心也因刺臣血以寫臣心明臣愚忠冀陛下憐察數年以來星變地震大水奇荒災異不可勝數而陛下不悟禍延太皇太后天之意欲陛下居衰絰中悔過自新以保大業也倘或不悟天

意或幾乎息矣夫大位者奸之窺也昔太康田於洛汭燭
帝行幸江都皆以致敗可不鑑哉方今朝廷空邊鄙空城
市空倉廩空天下皆知危亡之禍獨陛下不知耳治亂安
危在此行止此臣所痛心爲陛下惜復昧死爲陛下言也
凡數千言當天柱刺血時恐爲家人所阻避居密室雖妻子
不知旣上卽易服待罪聞者皆感愴而帝不悟也

石天柱傳

十四年二月壬申至自宣府

本紀

是年三月帝議南巡修撰舒芬等上疏極諫曰古帝王所
以巡狩者協律度同量衡訪遺老問疾苦黜陟幽明式序
在位是以諸侯畏焉百姓安焉若陛下之出不過如秦皇

漢武侈心爲樂而已非能行巡狩之禮者也博浪柏谷其
禍亦可鑒矣近者西北再巡六師不攝四民告病哀痛之
聲上徹蒼昊傳播四方人心震動故一聞南巡詔書皆烏
鶩獸散而有司方以奉迎爲名徵發嚴急江淮之間蕭然
煩費萬一不逞之徒乘勢倡亂爲禍非細且陛下以鎮國
公自命苟至親王國境或據勳臣之禮以待陛下將北向
朝之乎抑南面受其朝乎假令循名責實深求悖謬之端
則左右寵倖無死所矣尙有事堪痛哭不忍言者宗藩蕃
劉濞之釁大臣懷馮道之心以祿位爲故物以朝署爲市
廬以陛下爲弈棋以革除年間爲故事特左右寵倖知術

短淺無能以此言告陛下耳使陛下得聞此言雖禁門之外亦將警蹕而出尙敢輕騎慢遊哉

舒芬傳

八月癸未車駕發京師十二月丙戌至南京

本紀

江彬又欲

導帝幸蘇州下浙江抵湖湘諸臣極諫會其黨亦勸阻乃

止

三編

嘉靖十六年三月癸酉如天壽山丙午幸大峪山

十八年二月乙卯幸承天辛酉次真定望於北嶽三月己巳渡河祭大河之神辛未次鈞州望於中嶽四月壬子至自承天甲子幸大峪山

已上本紀

隆慶二年二月丙子幸南海子先是左右有言南海子之

勝者上將往幸都給事中王治率同官諫內閣徐階尙書楊博等並阻止皆不聽至則荒莽沮溼上甚悔之

王治傳

視學

洪武五年京師文廟成車駕幸大學行釋奠禮

春明夢餘錄時以應

天府學爲國子學蓋在應天府學行禮至十五年別立國子監成太祖復於國子監行釋奠禮

十五年五月己未國子學新成帝將行釋菜禮侍臣有言孔子雖聖人臣也禮宜一奠再拜帝曰昔周太祖如孔子廟左右謂不宜拜周太祖曰孔子百世帝王師何敢不拜今朕有天下敬禮百神於先師禮宜加崇乃命禮部尙書劉仲質詳議仲質請帝服皮弁執圭詣先師位前再拜獻

爵又再拜退易服乃詣彝倫堂命講庶典禮隆重詔曰可

劉仲質傳

永樂四年三月辛卯朔帝詣國子監禮部尙書鄭賜引宋制請服韃袍再拜帝不從仍服皮弁行四拜禮御彝倫堂授經設几榻賜講官及大臣翰林坐祭酒司業博士助教序進坐講諸生環列以聽禮志編

正統九年二月大學成三月辛亥朔幸大學釋奠先師祭酒李時勉當進講會久病及升堂講尙書詞旨清朗上悅賜予有加本紀及時勉傳

成化元年三月丁巳帝視大學釋奠先師始加牲用樂停

祭酒官以下宴止宴衍聖公三氏子孫於禮部
宏治元年三月癸酉幸大學先期致齋一日奠加幣牲用
太牢改分獻爲分奠尙書王恕請之也

已上
史概

嘉靖十二年三月丙辰上以先師祀典既正再視學命大
臣致奠啟聖公祠

禮志

隆慶元年八月癸未朔釋奠於先師孔子

本紀

天啟五年三月甲寅釋奠於先師孔子

本紀

魏忠賢欲先一

日聽祭酒講又議裁諸聽講大臣賜坐茶禮吏部尙書崔
景榮力持不可乃止

景榮傳

崇禎十四年八月行釋奠禮禮部先以八月初四請已報

可是日丁未舊例丁祭遣閣臣行禮乃改是月十八日躬行釋奠而初四日仍遣閣臣行禮

春明夢餘錄

十七年二月釋奠遣大學士魏藻德行禮是日天氣晴明臨祭各官甫就拜位大風忽起殿上燈燭盡滅庭下松檜作怒號聲黃沙如雨下竟不能成禮而罷

同上

明會要卷十三終